

ՀՀ Ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 29/11

18 նոյեմբերի 2014 թ.

Քննարկվեց «ԴՖ Դիստրիբյուշն» ՍՊԸ 28.10.2014 թ-ի գրությամբ բերված գանգատը ՀՀ ՖՆ Կոտայքի ՏՀՏ 29.08.2014 թ-ի թիվ 5010232 ստուգման ակտի դեմ:

«ԴՖ Դիստրիբյուշն» ՍՊԸ գանգատում բերված փաստարկները.

ՀՀ Ֆինանսների նախարարի 2014 թ-ի հուլիսի 7 թիվ 5010232 հանձնարարագրի համաձայն ՀՀ ՖՆ Կոտայքի ՏՀՏ-ի կողմից «ԴՖ Դիստրիբյուշն» ՍՊԸ-ում իրականացվել է բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության ստուգում: Ստուգումը փաստացի սկսվել է 15.07.2014 թ-ից, որից հետո ՀՀ Ֆինանսների նախարարի 07.08.2014 թ-ի թիվ Ս-1431-Ա հրամանով ստուգման ժամկետը երկարաձգվել է ևս 10 աշխատանքային օրով:

Ստուգման արդյունքում Կոտայքի ՏՀՏ-ի կողմից կազմվել են 20.08.2014 թ-ի թիվ 5010232 ակտի նախագիծը և 29.08.2014 թ-ի թիվ 5010232 ակտը:

Ակտի նախագծի 1-ին կետով նշված է, որ ըստ ներկայացված սկզբնական հաշվառման փաստաթղթերի և ՏՀՏ ներկայացրած 2013 թ-ի շահութահարկի հաշվարկի, ընկերությունը համախառն եկամտից նվազեցումները (ոչ արտադրական այլ ծախսերը) ավել է ցույց տվել 11738432 դրամի չափով, ինչի արդյունքում խախտվել է «Շահութահարկի մասին» ՀՀ օրենքի 10-րդ հոդվածի պահանջները:

Ընկերությունը վերը նշված ակտի նախագծի վերաբերյալ 23.08.2014 թ-ին ներկայացրել է առարկություն, որին կցել է ոչ արտադրական ծախսերին վերաբերող բոլոր փաստաթղթերի պատճենները: Մասնավորապես, առարկություններում նշվել է, որ 2013 թ-ի շահութահարկի հաշվարկում նշված 18.544.394 ՀՀ դրամի ոչ արտադրական այլ ծախսերը (կամ գործառնական այլ ծախսերը, ինչպես ներկայացվել էր Կոտայքի ՏՀՏ-ին ստուգման ժամանակ տրված տեղեկանքում) վերաբերում են վարձակալված տարածքների վարձավճարներին և տրանսպորտային միջոցների վառելիքի ծախսերին (դրանց մասով Ընկերությունը վարել է առանձնացված հաշվառում), որոնք համապատասխանում են «Շահութահարկի մասին» ՀՀ օրենքի պահանջներին և հիմնավորված են հարկային հաշիվներով (էլեկտրոնային), հաշիվ ապրանքագրերով, ՀԴՄ կտրոններով, որոնք համապատասխանում են ՀՀ Կառավարության 25 օգոստոսի 1998 թվականի թիվ 525 որոշման պահանջներին:

Կոտայքի ՏՀՏ-ի կողմից վերը նշված առարկությունները հաշվի չեն առնվել և կազմվել է 29.08.2014 թ-ի թիվ 5010232 ակտը:

Անհրաժեշտ նաև նշել, որ վերը նշված սկզբնական հաշվառման փաստաթղթերի բնօրինակներն մինչև փաստացի ստուգման ավարտն ամբողջությամբ ներկայացվել են Կոտայքի ՏՀՏ ստուգող տեսուչներին:

Հաշվի առնելով այն հանգամանքը, որ «ԴՖ Դիստրիբյուշն» ՍՊԸ-ն ունի ոչ արտադրական այլ ծախսերին վերաբերող բոլոր հիմնավոր փաստաթղթերը (որոնք անհրաժեշտության դեպքում մեկ անգամ ևս կներկայացվեն), ընկերությունը խնդրում է վերանայել ստուգման ակտով արձանագրված գումարները:

ՀՀ Ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ֆինանսների նախարարի 07.07.2014 թ-ի թիվ 5010232 հանձնարարագրի համաձայն «ԴՖ Դիստրիբյուշն» ՍՊԸ-ում (այսուհետ նաև ընկերություն) իրականացվել է բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության ստուգում: Արդյունքում կազմվել է ՀՀ ՖՆ Կոտայքի ՏՀՏ 29.08.2014 թ-ի թիվ 5010232 ստուգման ակտը (այսուհետ նաև ստուգման ակտ), որով լրացուցիչ գանձման է առաջադրվել ընդամենը 4.984.759 դրամ:

Ստուգման ակտի 1-ին կետով մասնավորապես արձանագրվել է, որ ըստ ներկայացված սկզբնական հաշվառման փաստաթղթերի և ՏՀՏ ներկայացրած 2013 թ-ի շահութահարկի հաշվարկի, ընկերությունը համախառն եկամտից նվազեցումները (ոչ արտադրական այլ ծախսերը) ավել է ցույց տվել 11.738.432 դրամի չափով՝ խախտելով «Շահութահարկի մասին» ՀՀ օրենքի 10-րդ հոդվածի պահանջները: Արդյունքում, ընկերության կողմից 2013 թ-ի շահութահարկի հաշվարկով 11.738.432 դրամի չափով պակաս հարկվող շահույթ ցույց տալու համար լրացուցիչ շահութահարկ է հաշվարկվել՝ գումարով 2.347.686 դրամ:

Միաժամանակ, ընկերությունն օրենքով սահմանված ժամկետներում չի կատարել նվազագույն շահութահարկի վճարումները՝ խախտելով «Շահութահարկի մասին» ՀՀ օրենքի 47.1-րդ հոդվածի պահանջները: Արդյունքում հաշվարկվել են տույժեր՝ ընդհանուր գումարով 809.400 դրամ:

Քննարկման ընթացքում պարզվեց, որ ընկերության կողմից 2013 թ-ի շահութահարկի հաշվարկում արտացոլված 18.544.394 դրամի ոչ արտադրական այլ ծախսերը վերաբերում են վարձակալված տարածքների վարձավճարներին, ինչպես նաև տրանսպորտային միջոցների վառելիքի գծով կատարված ծախսերին, որոնց վերաբերյալ Ընկերությունը վարել է առանձնացված հաշվառում:

Պարզվեց նաև, որ ստուգման ակտի 1-ին կետում արձանագրված խախտումը՝ համախառն եկամտից նվազեցումները (ոչ արտադրական այլ ծախսերը) 11.738.432 դրամի չափով ավել ցույց տրվելու վերաբերյալ, վերաբերվում է տրանսպորտային միջոցների վառելիքի գծով կատարված ծախսերին:

Հանձնաժողովը, ուսումնասիրելով ընկերության կողմից ներկայացված տրանսպորտային միջոցների վառելիքի գծով կատարված ծախսերը հիմնավորող փաստաթղթերը (հաշիվ ապրանքագրեր, ՀԴՄ կտրոններ) արձանագրեց, որ դրանք համապատասխանում են «Շահութահարկի մասին» ՀՀ օրենքով, ինչպես նաև ՀՀ կառավարության 25 օգոստոսի 1998 թվականի թիվ 525 որոշմամբ ծախսերը հիմնավորող փաստաթղթերին ներկայացվող պահանջներին:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ՖՆ Կոտայքի ՏՀՏ 29.08.2014 թ-ի թիվ 5010232 ստուգման ակտի 1-ին կետից նվազեցնել ընդամենը 4.175.359 դրամ, այդ թվում՝ շահութահարկ 2.347.686 դրամ, տույժ 419.062 դրամ, տուգանք 1.408.611 դրամ:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել ՀՀ վարչական դատարան:

Հանձնաժողովի նախագահ՝

